



*Editoryal*

## Agresyon sang US, PASLAWON

Ang nagahana nga agresyon militar sang US tanda sang labing paglaut sang garuk nga nagaharing sistema

Kadungan sa pagpanulsol sang gerang agresyon sang US sa Iraq, wala untat ang mga maniobra kag padihot sang magkahimbon nga US kag papet nga rehimeng Macapagal-Arroyo agud labing palalaon ang pagpasilabot militar sang US batuk sa rebolusyonaryong hublag sa Pilipinas.

*Sundan sa "Agresyon sang US...", pahina 2*

Halin sa Komite Sentral

## AB, duha ka beses na kada bulan

Umpisa subong nga Marso, iga paggwa sang Komite Sentral ang pahayagan nga **Ang Bayan** (AB) duha ka beses kada bulan.

Ang desisyon nga ini nakabase sa pagkilala sa malahalon nga papel nga ginatungdan sang **AB** bilang regular nga pangpolitika nga pahayagan pangmasa kag pangunahon nga alagyan sang propaganda sang Partido.

Kaangot sini, nagpangita kita sang inspirasyon halin sa handumanan ni Kaupod Antonio Zumel, komunista nga peryodista, kag anay puno nga editor sang **AB**.

Sa nagtaliwan nga mga tuig, gingamit sang Partido ang **AB** agud matalom nga ibuyagyag kag batuan

ang sunod-sunod nga anti-pumuluyo kag maka-imperialistang papet nga rehimen kag ang kabilugan lubong-sa-krisis nga nagaharing sistema nga malakolonyal kag malapyudal. Kaangot sa mga ini, nangin instrumento ang **AB** sa pag-athag sang mga tulungdan sa pagpabakod sang Partido kag rebolusyonaryong hublag kag pagpasulong sang kahublagang masa, nagahiliugyong prente kag armadong paghimakas. Kinahanganan gid kaayo ang masunson kag santo sa panahon nga pagpaggua sang **AB** agud madasig nga maathag sang Partido ang mga analisis, panindigan, polisiya kag panawagan sini sa atubang sang

nagabag-o-bag-o nga mga halambalanon pungsudnon kag pangkalibutanon kag labing nagadasig nga kumpas sang rebolusyonaryong hublag.

Sa amo man importante ang **AB** sa madasig kag wala untat nga pag-athag sa mga katapu, rebolusyonaryong pwersa kag pumuluyo sang mga prinsipyo kag panindigan sang Partido kag rebolusyonaryong hublag bahin sa nakapanahon nga mga isyu agud mas epektibo maisulong ang mga rebolusyonaryong hilikton sa nagkalain-lain nga patag kag sakup labi na sa atubang sang wala untat nga pagpanamad sang

*Sundan sa "AB...", pahina 4*

Sa atubang sini, labing nagabaskog ang pagpamatuk kag pagbatu sang mga rebolusyonaryong pwersa kag pumuluyo. Kadungan ini sa nagalapad nga pagpamatuk sang pumuluyo sa Pilipinas kag bug-os nga kalibutan batuk sa plano nga pagsalakay sang US sa Iraq.


**B**unga sang malaparan nga pagpamatuk, nahuy-an sang lubos nga napaatras ang Malakanyang kag US sa una nga plano sini nga pasudlon sining Pebrero ang mga tropang Amerikano sa Sulu, gamit ang Balikatan 03-1 kag sa ngalan sang pagbatu sa Abu Sayyaf. Sa atubang sini, nagdihon sang isa ka iskema ang US State Department kag Malakanyang agud lunuron ang mga singgit sang pagpamatuk sa todo-todo nga gera kag batuk sa deployment sang mga tropang Amerikano. Ginkasugtanan ang plano nga ini nanday Gen. Angelo Reyes kag Defense Secretary Donald Rumsfeld sang US.

Agud pagguwaon nga kinahanglan ang pagpasingki sang gera kag ang "bulig sang Amerika," nagasabwag

subong ang AFP sang isa ka maduguon nga kampanya sang teror kadungan sang pangpolitika nga kampanya agud pag-guwaon kinahanglan ang bulig sang US.

Kalakip sang padihot nga ini ang pagbomba sa Davao International Airport sadtong Marso 4, nga ginkamatay sang masobra 20 inosenteng sibilyan kag ginkapilas sang masobra 100 pa. Pagkatapos gilayon sini, madasig nga ginpasibangdan sang AFP ang MILF kag BHB. Madasig msn nagtanyag sang "bulig" ang US nga ginsabat naman sang koro sang AFP kag mga pulitiko nga nagaingos pasudlon ang mga tropang Amerikano.

**M**adugay na nga gusto gid sang rehimeng Macapagal-Arroyo kag amo sini nga imperyalismong US nga direktang itumod ang mga pwersang US batuk sa rebolusyonaryong hublag. Mismo si Macapagal-Arroyo ang una



nga nagpamilit nga ilunsar ang Balikatan 03-1 sa Timog Katagalugan, kon sa diin matingkad ang kadalag-an sang rebolusyonaryong hublag. Ang ginaanunsyo nga plano nga hiwaton ang Balikatan 03-1 sa Mindoro mahimo bilangon nga isa ka akto sang probokasyon sang mga dumuluong nga tropa sa rebolusyonaryong hublag.

Sa subong, may indi magkubos sa 1,300 interbensyunista nga tropang Amerikano sa nagkalain-lain nga bahin sang Pilipinas para kuno sa mga paghanas. Pero ang matuod nga malawigan nga katuyuan nila amo ang maghanda para sa direkta nga pag-entra sa gerang kontra-gerilya batuk sa BHB kag MILF.

Isa sa mga posibilidad nga ginalanuhan sang US kag sang papet sini nga rehimen amo ang paglunsar sang dalagkuon nga agresyon militar nga pareho sadto sa Vietnam. Sa atubang sang padayon nga paglapad kag pagbaskog sang rebolusyonaryong hublag, nagadali ang reaksyunaryong rehimen nga pasingkion ang gera. Desperado ini sa bulig kag direktang pag-entra militar sang US.

**N**abudlayan gid katama ang magkahimbon Bush-Arroyo nga lapakon sang ila plano para sa pagpasingki sang interbensyon militar sang US sa atubang sang labing nagabaskog kag nagalapad nga pagpamatuk diri.

# ANG *Bayan*

Tug XXXIV No. 3 Marso 7, 2003

Ang *Ang Bayan* ginabantala sa lenggwae nga Pilipino, Bisaya, Iloko, Hiligaynon, Waray kag Ingles.

Mahimo i-download halin sa Philippine Revolution Web Central nga makitan sa [www.philippinerevolution.org](http://www.philippinerevolution.org)

Nagabaton ang *Ang Bayan* sang mga kontribusyon sa forma sang mga artikulo kag balita. Ginabuyok man ang bimalasa nga magpaabot sang mga saway kag rekomendasyon sa ikauswag sang aton pahayagan. Malabot kami paagi sa email sa [editors\\_angbayan@yahoo.com](mailto:editors_angbayan@yahoo.com)

## Kaundan

Editoryal	1
<b>AB</b> , 2 beses kada bulan	1
Sugilanon pangkalinungan ginbasura sang GRP	3
Inaway gerilya sang MILF	4
Mga kadalag-an sang <b>AB</b>	
Nagadaku nga sablag	6
Nagapamatuk ang kalibutan sa gera	7
Mga tampok nga paghulag	8
Paghulag sa Luneta	9
AGILE: Gaway sang US	9
Mga opensiba sang BHB	11
Balita	12

Ang *Ang Bayan* qinabantala duha ka beses kada bulan  
sang Komite Sentral sang Pilipinas

Ang una nga plano nga direkta ideploy sa kombat sa Sulu ang mga tropang Amerikano mabaskog ginkundesar sang nagkalain-lain nga sektor, mga senador kag kongresista.

Gindeklarar ini nga "pinakamaitum nga dagway sang pagtraidor" sang rehimeng Macapagal-Arroyo. Wala mahatagan sang mabaton kag ligal nga basehan ang pag-entra sa kombat sang mga tropang Amerikano bisan pa gamiton nga dahilan ang gera batuk sa Abu Sayyaf.

Ginpakamalaut man ini sang pumuluyo sang Sulu. Ginpalab-as sini ang mga nagligad nga mapintas nga kalakasan nga naagyan sang pumuluyo sa isla sa kamot sang mga mapanakop nga tropang Amerikano sadtong 1901 kag liwat nagtaas ang kamuklutan nila batuk sa dumuluong nga mananakop.

Nakahanda ang pumuluyo kag rebolusyonaryong hublag nga batuan ang mga plano padulong sa direktang armadong agresyon sang US sa Pilipinas. Wala nahadlok ang pumuluyo kag rebolusyonaryong hublag sa pamahog sang isa ka nagakawasdak nga rehimeng kag sang imperyalista nga lubong sa krisis. Sa nagkalain-lain nga bahin sang Mindanao, nakahanda man sa ubos-kusog nga pagbatu ang pumuluyong Moro. Ang mga tropang Amerikano nga magpasilabot sa Sulu, siling nila, pagapabayaron sang ilang mga utang nga dugo. Ang rebolusyonaryong hublag, ilabi na subong, madasic nga nagasulong kag nagabaskog. Agud paslawon ang malaut nga padihot sang rehimeng US-Macapagal-Arroyo, handa ini nga atubangon ang tanan nga patag sang

paghimakas: armado kag indi armado, ligal kag iligal, hayag kag tago, sa kaumhan kag kasyudaran, sa sulod kag guwa sang pungsod.

Ang paglala sang interbensyon militar kag ang nagadaku nga katalagman sang direktang agresyon militar sang US tanda sang daku nga dugang nga paglaut sang garuk nga malakolonyal kag malapyudal nga sistema.

Batuan sang pumuluyo kag rebolusyonaryong hublag ang kada padihut sang rehimeng US-Macapagal-Arroyo nga ipatuman kag palaparon ang pagpasilabot militar sang US. Kag pananglitan direkta ipatuman ang agresyon militar, ubos-kusog nga batuan ini tubtub matabog ang mga mapanalakay nga tropang Amerikano. **AB**

## Sugilanong pangkalinungan, ginbasura na sang GRP

Sa tunga sang nagapasingki nga interbensyon militar sang US, labing nagabaskog ang buot sang papet nga rehimeng Macapagal-Arroyo nga ipatuman ang makadumuluong kag militarista nga mga tikang. Lakip sa mga "kaswalti" sini ang sugilanong pangkalinungan lunsay sa NDFP kag MILF.

Sa kaso sang NDFP, ginakategorya nga "terorista" sang reaksyunaryong gubyerno ang PKP, BHB kag si Kaupod Jose Ma. Sison, nga lapas sa Joint Agreement on Safety and Immunity Guarantees, ang kasugtanan nga nagahatag-kasiguruhan sa seguridad sang mga imbolbado sa sugilanong. Kadungan sini, ginkampanya man sa gubyernong US kag mga gubyerno sa Europe nga ilakip si Kaupod Sison kag ang PKP kag BHB sa listahan sang "foreign terrorist organizations." Tuyo sini nga ipiton ang mga rebolusyonaryong pwersa agud magpasugot ang mga ini nga magpirma sa "final peace agreement" nga wala sang iban ginahambal kundi pagsurender sang armas kag pagsurender sang bilog nga rebolusyonaryong hublag.

Ang pagbalibad sang Malakanyang nga bawion ang pagkategorya nga terorista sa rebolusyonaryong hublag kag padayon nga pagpamilit sini nga magsurender imbes lubaron sa lamesa sang negosasyon ang mga ugat sang gera sibil sa Pilipinas amo ang nagasablag

sa sugilanong pangkalinungan. Gindeklara sang Malakanyang ang wala kutod nga suspensyon sang sugilanong pangkalinungan bilang tikang sa lubos nga pagbasura sini.

Halos amo man sini ang ginahimo nga pagmaniobra sang rehimeng agud ibasura ang kasugtanan untat-lupok kag sugilanong pangkalinungan sa Moro Islamic Liberation Front (MILF). Umpisa Pebrero 11, apat ka adlaw nga ginbalbal sang mabaskog nga operasyon militar ang Liguasan Marsh sa North Cotabato kag Maguindanao, nga labag sa nagaluntad nga kasugtanan untat-lupok sa tunga sang GRP kag MILF.

Ginlunsar sang AFP ang mga operasyon agud pwersahon ang MILF nga batunon ang mga probisyonal sang kasugtanan nga ginhanda sang rehimeng sa balayon man sang pagsurender sang MILF. Pareho sa NDFP, ginapataw sang GRP ang ultimatum sa MILF: kon indi magsugot ang MILF sa ginaproponer nga balayon sang sugilanong, bilangon ini nga "terorista" kag pabaskugon ang mga atake batuk diri. Sa tunga sang amo nga kabaskog nga pang-insulto kag pagtalikod sa kasugtanaon untat-lupok, gindeklarar sang MILF nga tapos na ang sugilanong pangkalinungan kag panahon na para sa gerilya nga kontra-opensiba batuk sa AFP. **AB**

## Inaway gerilya, ginalunsar sang MILF

"Ginsukob kita, gani... tanan nga may armas dapat magbatu tubtub kamatayon," suma sang 30-minutos nga panawagan sa pumuluyong Moro sadtong Pebrero 24 ni Hashim Salamat, tagapamuno sang Moro Islamic Liberation Front (MILF). Sa iya pahayag sa radyo, mabinatyagon nga ginsaad ni Salamat nga kinahanglan magbuhis sang kabuhi. Sa sini nga paagi lamang, siling niya, maangkon ang kahilwayan nga handum sang pumuluyong Bangsamoro.

Ang mensahe ni Salamat sabat sa wala untat nga panibagong atake sang AFP sa mga kampo sang MILF nga nag-umpisa sadto pang Disyembre 2002 kag nagdugang pa umpsa nga ginmandu ni Macapagal-Arroyo sadtong Pebrero 15 nga ubuson ang MILF. Tiko nga ginrason sang mga upisyal ni Macapagal-Arroyo nga ginlapas sang MILF ang kasugtanan untat-lupok kag ginhambal nga dapat ini bilangon nga "terorista."

Umpisa sadtong Pebrero 8, masobra 120,000 pumuluyo sa Maguindanao kag North Cotabato ang pwersado nagbakwet bunga sang pagpangbomba kag operasyon sang AFP. Bangud sa mga operasyon sang AFP, ginsiling ni Salamat nga "Wala na subong sang untat-lupok, wala na sang sugilanon pangkalinungan."

Sa pagdepensa sa kaugalingon, naglunsar sang serye sang mga gerilya kontra-atake ang mga hangaway sang MILF isa ka adlaw makaligad sakupon sang AFP ang "Bulio Complex" nga nagasakup sa North Cotabato kag Maguindanao. Napulo ka elemento sang Philippine Marines ang namatay sa ambuson sa Narciso Ramos Highway sa Parang, Maguindanao, kag isa ka tangke ang nawasak sa Balabagan, Sultan Kudarat sadtong Pebrero 16.

Sadtong Pebrero 18, nag-abot naman sa 16 ang patay kag 15 ang pilason sa mga elemento sang 26<sup>th</sup> IB, 64<sup>th</sup> IB kag mga paramilitar sang ambuson ang isa ka salakyan militar kag ginlunsar ang iba pang reyd sa Matanog, Shariff Aguak kag Datu Piang sa Maguindanao kag sa Kauswagan, Lanao del Sur. Samtang, ginharas sadtong Pebrero 22 ang detatsment sang 57<sup>th</sup> IB sa Barangay Bitu, Datu Odin Sinsuat, Maguindanao. Gin-ambus naman kag napatay sadtong Pebrero 24 sa Sirawai, South Cotabato ang duha ka elemento sang CAFGU; kag anum ka suldato sa Buldon, South Cotabato.

Lima ka suldato ang napatay sang salakyon sang MILF ang detatsment sang 33<sup>rd</sup> IB sa Barangay Timbabawan, Tungawan, Zamboanga Sibugay sadtong Pebrero 25. Tatlo naman ka elemento sang 7<sup>th</sup> IB ang napatay sa Barangay Lagandang, Isulan, Sultan Kudarat sang ambuson sila diri sadtong Pebrero 28. **AB**

imperialismong US kag mga lokal nga reaksyunaryo.

Kinahanglan man magserbi ini nga alagyan sang mga organisasyon kag katapu sang Partido kag rebolusyonaryong pwersa sa bug-os nga pungsod para sa bayluhanay sang mga balita, impormasyon, panawagan, inagihan kag mga leksyon sa pagpasulong sang rebolusyonaryong hublag sa kabilugan kag tagsa nila ka sakup.

Padayon kag pursigido nga ginalubad sang Partido halin sa Komite Sentral tubtub sa mga basehang yunit ang pila ka halambalanon sa pagpaggua sang **AB**. Ang mga pagtinguha sa tanan nga lebel nagasalaming sang paghatag importansya sa **AB** bilang malahalon nga instrumento sa wala-untat nga pagpatalom sang Partido sa pulitika. Malahalon man ini sa pagpanday sang paghiliusa sang bilog nga Partido sa ideolohiya, pulitika kag organisasyon kag sa pagpamuno sini sa rebolusyonaryong pwersa kag pumuluyo para sa pagpasulong sang rebolusyonaryong paghimakas.

Kaangot sa pagsunson sang pagpaggua sang **AB** kag mga kaangot nga tulundan, ginakinahanglan desaysibo nga atubangon kag padayon nga lubaron ang masunod nga mga halambalanon:

- Dugang nga pag-areglo, pagpadasig kag pagpalapad sang sistema sang direkta kag indirektang pagreport ukon koresponsal agud madali mapublisar sa **AB** ang sitwasyon, halambalanon, kag kag pagsulong sang rebolusyonaryong hublag sa tanan nga patag sang hilikuton kag sa tanan nga bahin sang pungsod. Ginatinguahan naton dugang nga makasabat ang **AB** sa pinakalab-as nga mga hitabo kag halambalanon kag agud maayo nga makabulig sa pag-ubay sa subong naton nga mga taktika kag praktika. Kinahanglan matumod ang mga korespondent sa nagkalain-lain nga sakup sang pagtrabaho, lakin ang mga puno nga korespondent halin sa mga nagapamuno nga organo. Sila ang responsible sa pagsiguro nga ang mga balita kag impormasyon halin sa sakup dapat nila mapaabot sa editorial istap sang **AB** gilayon matipon kag maabtik kag sigurado nga napadala.

- Dugang nga pagpadaku sang sirkulasyon sang **AB** agud siguraduhon may kopya indi lamang ang kada katapu sang Partido, kundi mangin ang mga hangaway sang hangaway sang banwa, mga


lider kag aktibista sang mga rebolusyonaryong organisasyong masa. Obligasyon sang mga nagapamuno nga komite sang Partido nga organisahon ang reproduksyon sang pahayagan sa ilalim kag pabaskugon ang makinarya diri agud masabat ang kinahanglanon sang nagalapad nga baseng masa.

3. Dugang nga pagpadasig kag pagpasanyog sang sistema sang distribusyon. Maid-id nga tun-an kag tasahan ang pagsiguro nga ang mga kopya sang **AB** gilayon kag maayo nga makaabot sa mga bumalasa sini. Kanugon ang tanan nga kabudlay kag gastos sa pagpasanyog sang nagkalain-lain nga aspeto sang pahayagan kon sa katpusan magatambak ini sa mga talaguan kag bagsakan sang tubtub isa ka simana kag bulan sa baylo nga makaabot gilayon sa mga bumalasa. Dapat pursigido nga lubaron ang mga bara kag problema sa distribusyon kag padayon nga pauswagon ang sistema

sang pagpahulag kag koordinasyon sang nagkalain-lain nga bahin sang kahublagan para diri. Ang mga pag-uswag diri panginpusulan indi lang sa hilikuton propaganda kundi mangin sa iban pa nga hilikuton kag paghimakas.

4. Hugot nga pag-angkon sang basehang nga paghiliusa sa mga pagsulundan sa pagsalhin sa nagkalain-lain nga edisyon. Malahalon nga labing mapapagsik ang mga bayluhanay kag pagbuligay bahin sa mga ginapaggwuwa nga translesyon sang **AB** agud mapat-ud ang nagapadayon ang pagpauswag sang hilikuton pagsalhin.

Kaangot sa mga ini, buot namon tum-ukan nga ang **AB** isa ka malaparan nga kolektibong pagtinguha sang



Partido kag rebolusyonaryong kahublagan masa—halin sa pagpadala sang mga report/koresponsal kag artikulo, pag-imprenta, pagpadamo, pagpanagttag kag paggamit sini sa propaganda kag edukasyon sang mga pwersa kag pumuluyo. **AB**

## Pila ka tampok nga kadalag-an sa pagbantala sang **AB**

- 30 bulan pasunod nga pagguwa sang bulanan nga isyu sang **AB** umpsisa Septyembre 2000, luwas pa sa mga espesyal nga isyu.
- Isa sa mga tumalagsahon nga pahayagan sa Pilipinas nga nabantala sa anum ka pangunahon nga lenggwaheng pungsod (orihinal nga Pilipino kag salhin sa Ingles, Bisaya, Iloko, Hiligaynon kag – umpsisa Mayo 2000—Waray. Patimaan ini sang desisyon sang Partido nga ipalapit ang **AB** sa pinakamadamo nga lenggwaheng mahangpan nila.
- Mas madasig nga napalapnag ang **AB** paagi sa pursigido nga paggamit sang *internet*. Liwat ginbuhi ang *website* sini sadtong 2002 pagkatapos masabotahe ini sadtong Disyembre 2001 sa atubang sang pagpang-ipit sang US.
- Ginapadamo sa nagkalain-lain nga pamaagi. Sa pila ka rehiyon, lapnagon ang kolektibo nga pagtinguha sang

bilog nga kahublagang masa kag sa bulig sang alyado sa madamuan nga reproduksyon sa paagi sang mimeograph o *v-type*; ang papel, tinta kag iban pa nga kinahanglanon masami ginapatuhaw sa bulig man sang masa kag mga alyado. Luwas sa pagpangalap sang materyal nga donasyon, sa madamu-damo nga lokalidad nangin maayo nga polisiya ang pagbayad sang mga bumalasa sa kopya sang **AB** para masustenir kag mas mapadaku ang sirkulasyon sang pahayagan. Sa nagkalain-lain nga rehiyon nagagamit man sang mas moderno nga pamaagi pareho sang *offset, digital duplicator, photocopier, computer printer* kag iban pa.

- Napanagttag sang masobra tig-isa ka kopya kada katapu sang Partido sa pungsudnon nga abereyds. Sa pila, nagaabot sa masobra 10 kada katapu. May lebel sang pagpalapnag sang sistema sang distribusyon nga nagaagi kag nagalapos tubtub sa mga interyor nga sityo sa kaumhan. **AB**

# Nagadaku nga sablag

**Nagaatubang sang isa ka nagalapad nga pangkalibutanon nga kahublagan anti-gera ang plano nga pagsalakay sang US sa Iraq**

**P**adayon nga arrogante nga ginabale-wala sang imperyalismong US ang malapad nga pagpamatuk sang pumuluyo kag mayorya sang mga pungsod sang kalibutan sa plano nga salakayon kag agawon ang pungsod Iraq. Labi ini nangin desperado sa atubang sang nagabaskog nga pagpamatuk kag dugang nga pagkahamulag sang US kag pila ka kahimbon sini.

Sining Pebrero, masobra na 310,000 tropa sang US ang nagapalibot sa Iraq. Magaabit man sa 40,000 tropa sang United Kingdom ang nakadeploy didto agud magtibang sa mga tropang Amerikano. Kadam-an sang mga pwersang ini ara sa lindero sang Kuwait kag nakatumod sa syudad sang Basra sa Iraq. Ang 10,000 pwersang US nga nakaistasyon sa Afghanistan ginpusiyon man sa nagahana nga pagpanalakay. Maluwas sa pila ka yabi nga yunit-militar, kumpleto na ang arsenal sang US sa Middle East. Sa amo pa man, nagaatubang sang panibagong sablag ang US. Sining Marso 1, bunga sang malaparan nga protesta sang pumuluyo sa pungsod, napaslawan ang US nga ilusot sa parlamento sang Turkey ang pahanugot para sa pagbabase sang pwersa militar sang US sa nabagatnang bahin sang pungsod. Tuyo sang US nga ideploy sa Turkey ang 62,000 tropang Amerikano, 255 eroplanong panggera kag 65 helikopter para sa opensiba sini batuk sa Iraq.


Para mabutong ang mga pwersa sang Iraq sa pagdepensa sa naaminhan kag timog, daku nga bentahé kuntani ang paggamit sang Turkey bilang lunsaran halin sa naaminhan, kadungan sang paggamit sa Kuwait (kag Qatar) halin naman sa timog. Pero bangud nagbalibad ang Turkey nga maglunsar sang atake halin sa ila, maobligar ang US nga magbag-o sang plano kag maglunsar sang atake halin

sa Black Sea (dagat sa norte sang Turkey) ukon maghimo sang iban nga pamaagi.

Bag-o ini, nag-balibad ang North Atlantic Treaty Organization (NATO) nga hatagan sang suporta-militar ang. Ginpangunahan sang Germany, Belgium kag France ang pagbalibad sa hingyo sang US nga magpadala sang dugang nga gamit kag ayuda militar sa Turkey bilang preparasyon sa anuman nga "balik-salakay sang Iraq sa pungsod." Kadungan sang pagkapaslaw sini sa Turkey, napilitan bisan ang League of Arab States (Arab League) nga magpahayag para sa "lubos nga pagsikway sa anuman nga agresyon batuk sa Iraq." Ang Arab League ginabug-usan sang 22 pungsod nga nagapalibot sa Iraq. Sa pihak sini, padayon nga ginabomba sang mga eroplano militar sang US ang importante nga pasilidad sa nabagatnan nga bahin sang Iraq. Paliwat-liwat ginapahambog sang US nga padayunon niya ang gerang agresyon sa Iraq, may suporta man ini sang UN ukon wala.

## **Pagkatunga-tunga sang mga imperyalistang pungsod**

Ang arogansya kag unilateralismo sang imperyalismong US nagapadalum sa banggianay sa kubay sang mga imperyalistang pungsod kag



pagkahamulag sang mga pinakamasupog manulsol kag magsuporta sang gera. Natunga subong ang mga pungsod sa kalibutan sa tunga sang pila ka nagabug-os sang mahuyang nga alyansa maka-US-United Kingdom, Australia kag Spain kag pila ka papet nga estado nga kapot nila-kag sang mas madamu nga pungsod sa kalibutan nga kontra sa gera.

Ang pagpaketig-a sang US nga salakayon ang Iraq lubos nga nagbuyagyag sa kasingkion sang kontradiksyon kag labaw nga pagkahamulag sang US bisan sa sulod sang mga pangkalibutanon nga institusyon nga gintukod para mangin alagyan lamang sang mga polisiyang imperyalista.

Sa Marso 7, igapresentar sang US ang resolusyon nga nagahusga sa Iraq sa paglapas sa mga pagsulundan sang UN sa paghimo kag pagmentenar sang *weapons of mass destruction*, isa ka kondisyon nga gusto sini gamiton agud mangin ligal ang pagpanalakay sa Iraq. Wala pa man ini mapresentar, nagpahayag na ang kadam-an sa mga pungsod nga kontra diri, labi pa wala ginasuportahan sang *weapons inspec-*

*Sundan sa "Nagadaku...", pahina 7*

# Pangkalibutanon nga pagpamatuk sa gera

Sa indi pa matupungan nga mga aksyong protesta,  
napakita ang nagahiliusa nga panindugan

**S**adtong Pebrero 14-16, naglanog sa bilog nga kalibutan ang pagkundenar kag pagpamatuk sang minilyun-molyon nga pumuluyo sa mapanggera kag mapiguson nga polisiya sang imperialismong US. Isa ini ka panibag-ong kapagsik kag paglab-ot sa putuk-putukan sang kahublagang anti-imperialista sa kalibutan.


Tumalagsahan ang nalab-ot nga sakup sang paghiliusa sang pangkalibutanon nga kahublagang masa batuk sa mga gerang agresyon sang US sa pangabilugan kag batuk sa nagahana nga pagsalakay sito sa Iraq sa partikular. Ginapamatukan man sini ang iban pa nga gerang agresyon subong sang US: ang agresyon sini sa Afghanistan, ang pang-umpisa sa Pilipinas kag padayon nga pagpahanugot kag pagsuporta suporta sini sa agresyon sang Israel batuk sa Palestine.

Masobra 12 milyones ka pumuluyo ang koordinado nga dumagsa sa mga pangunahong karsada kag pangpublikong lugar sa Europe, America, Asia, Africa kag Latina America (Lantawon ang listahan). Mangin sa pinakapunta sang kalibutan—sa Antarctica—nagtapon ang mga syentista kag manalawsaw nga nakabase diin agud makig-isa sa bilog nga kalibutan. Gamit ang *internet* kag iban pa nga pamaagi, nakoordinar kag natipon ang pinakamalapad nga pagpamatuk sa pagpanggera sang US sa Iraq.

Sa mga yabing syudad sa Europe kag North America (Canada kag US), ang mga demonstrasyon sadtong Pebrero 14-16 ang pinakadaku kag pinakamalapad na sa kasaysayan nila. Nalampasan na sang mga ini ang pinakadaku nga rali sadtong panahon sang gera sa Vietnam.

Sa iban pa nga bahin sang kalibutan, nagabwelo kag nagabaskog ang mga kahublagang protesta, labi na sa mga papet nga estado nga masupog nga nagasuporta sa polisiyang agresyon sang US.

Bangud sini, napunggan ang kadam-an sa papet nga estado nga direktang sumuporta sa agresyon. Sa mga pungsod kon sa diin pinakamabaskog ang protesta, madasig



nga nahamulag sa malapad nga pumuluyo ang pinakamaspoug nga tagasuporta sang gera.

Pati sa kubay sang mga reaksyunaryo, nagadamu ang nagapamatuk. Napihak ang reaksyunaryong sahi sang Turkey sang bumuto ang 251 myembro sang parlamento sini batuk sa plano sang US nga himuong base sang gera ang ila pungsod. Sa United Kingdom, madamo ang nagboto sa mga kapartido ni Prime Minister Tony Blair batuk sa iya hagna nga bulag suportahan ang pagpakiggera sang US.

Sa sulod sang US, masobra 80 lokal nga konseho, lakip ang konseho sang syudad sang Los Angeles, ang nagpresentar sang resolusyon batuk sa plano nga gera sang gubyernong Bush.

*Sundan sa "Pangkalibutanon...", pahina 8*

"Nagadaku..." halin sa pahina 6

tion team ang pagtasa nga ini sang US.

Ginasinggit man sang kadam-an nga magagmay kag atrasado nga pungsod ang pagpamatuk nila sa

arogante nga pagkurukuso kag pangpanggera sang imperialismong US. Sa ika-13 kumperensya sang Non-aligned Movement (NAM) sadtong Pebrero 24-25, naghiliusa kag nagpirma ang 116 katapu nga pungsod sini sang resolusyon batuk sa

paglunsar sang US sang gera sa Iraq. Sa pananawan sang NAM, tuyo sang pagpanggera sang US nga pasanyugon ang dominasyon sini sa kalibutan. Ang US subong ang ginakabig nila nga pinakadaku nga peligro sa mayorya nga pungsod. **AB**

**W**ala kakapoy nga nagakampanya kag nagalunsar ang pumuluyo sang nagkalain-lain nga porma sang paghulag. Nagsulat sang mga tula kontra-gera ang masobra 5,000 mamalaybay bilang amot sa nagalapad nga kahublagang masa. Nagpaggwu sang mga anunsyo sa radyo kag telebisyon ang mga artista, atleta kag iban pa nga kilalang personalidad. Gintamay sa mga drama sa UK ang arogante nga panindugan sang presidente sang US. Gin-organisa sang masobra 400,000 aktibista ang mga *phone, FAX* kag *internet brigade* sang pumuluyo agud bahaon sang minilyun-milyon nga protestang mensahe ang White House kag iba pang upisina sang gubyerno sa US. Sa Malaysia, nagpirma ang halos isa ka milyon katawo sa petisyon kontra sa gera.

Madamo man ang matinugahon kag tumalagsahon nga porma sang protesta. Nag-abot sa Iraq ang pila ka grupo agud mangin “panaming-nga-tawo” (*human shields*) kag nagpatunga sa mga talargeton nga mga bomba sang US. Ginatus-gatos nga kababaihan kag kalakihan ang separado hublas nga nagprotesta sa Australia, US kag Chile.

May pila ka grupo ang naglunsar sang *citizens weapons inspection* sa US kag mga kaalyado sini nga pungsod sa Europe. Pamatud-an nila nga ang US sa baylo sang Iraq amo ang pamahog sa seguridad sang kalibutan, bangud ini ang may pinakadamo nga armas nukleyar, biolohikal kag kemikal-nga ginabilang mga armas para sa madamuan nga pagpanghalit. May ara man nagprotesta paagi sang pag-abang sa mga tren nga nagadala sang mga gamit panggera sa US padulong sa Middle East.

**N**agapadayon ang protesta. Linibu-libo nga estudyante nga Americano ang naggwu sa ila mga hulot-klasehan sining Marso 5. Sa idalum sang programa nga “Books not Bombs” (Libro, indi gera), ginapaabot nila ang ila paghiliusa sa mga estudyanteng Iraqi nga lubos naapektuhan sang gerang agresyon.

Sa Turkey, naggwu sa kalye ang 100,000 pumuluyo agud ipaabot ang ila pagpamatuk sa mga myembro sang ila parlamento samtang nagabotohay sa resolusyon nahanungod sa pagpasulod sang dugang nga tropang Amerikano sa Turkey. Sang napaslawan ipasa ang hagna, dugang nga nagdaku ang demonstrasyon agud iselebrar ang ila kadalag-an.

Sa Malaysia sining Pebrero 24, nag-abot sa 200,000 ang nagrali sa sentrong syudad. Nag-abot naman sa 100,000 ang nagprotesta sa Pakistan sining Marso 4. **AB**

## **Mga tampok nga paghulag sadtong Pebrero 14-16**

- \* Italy: Rome, Monza, Turin: 2.5 milyon
- \* Spain: Madrid, Barcelona, Seville, Oviedo, Las Palmas, Cadiz, Girona: 3.68 milyon
- \* Britain: London: 1.5-2 milyon
- \* France: Paris, Montpellier, Lyon: 840,000
- \* US: New York City, Los Angeles, Seattle, Minneapolis, San Diego, Philadelphia: 910,000
- \* Germany: Berlin, Stuttgart: 55,000
- \* Australia: Melbourne, Newcastle, Perth, Canberra: 255,000
- \* Greece: Athens, Thessalonika: 240,000
- \* Canada: Montreal, Toronto, Vancouver, Edmonton: 270,000
- \* Ireland: Dublin, Belfast: 170,000
- \* Belgium: Brussels: 100,000
- \* Portugal: Lisbon: 100,000
- \* The Netherlands: Amsterdam, 80,000
- \* Sweden: Stockholm, Gotenburgh, Malmo: 80,000
- \* Scotland: Glasgow: 100,000
- \* Norway: Oslo, Tondheim, Stavenger, Bergen: 84,000
- \* Mexico: Mexico City, 50,000
- \* Uruguay: Montevideo, 50,000
- \* Denmark: Copenhagen, 35-40,000
- \* Austria: Vienna, 30,000
- \* Japan: Tokyo, 25,000
- \* Hungary: Budapest, 20,000
- \* Baque Country (Spain): Irunea, 20,000
- \* Luxembourg: 15-20,000
- \* Brazil: Rio de Janeiro, Buenos Aires, Sao Paolo: 60,000
- \* Finland: Helsinki, Turku: 20,000
- \* India: Calcutta, 10,000
- \* South Africa: Johannesburg, Capetown: 15,000
- \* Croatia: Zagreb, 10,000
- \* New Zealand: Auckland, Wellington, Christchurch, kag iban pa: 21,500
- \* Iraq: Baghdad: 100,000
- \* Egypt: Cairo, 2,000
- \* Korea: Seoul, 10,000
- \* Philippines: Manila, 6,000
- \* Palestine: Gaza, 15,000
- \* Switzerland: Bern, 40,000
- \* Syria: Damascus, 200,000
- \* Thailand: Bangkok, Pattani: 13,000
- \* Turkey: Istanbul, 5,000
- \* Peru: Lima, 5,000


## 100,000, nagrali sa Luneta

Nag-abot sa 100,000 katawo ang nagtambong sa Prayer Assembly for Peace sa Quirino Grandstand, Luneta (Rizal Park) sadtong Pebrero 28 agud ipahayag ang ila mabaskog nga pagpamatuk sa gera lunsay sa Iraq kag sa Mindanao. Halin sila sa kubay sang mga imol, petiburgesya, pungsudnon nga minorya kag nagkalain-lain nga relihiyon kag sekta. Ang rali amo ang pinakadaku sa sunod-sunod nga mga paghulag sa Pilipinas umpsa Enero batuk sa mapanalakay nga gera sang US sa Iraq.

Luwas sa mga katapu sang mga militanteng organisasyon pareho sang BAYAN kag Bayan Muna, nagtambong man si Vice President Teofisto Guingona kag mga lider kag tiglawas sang iban pang institusyon pareho sang Catholic Bishops Conference of the Philippines. Ginhambal ni Rafael Mariano sang BAYAN nga naga-isahanon na lamang si Macapagal-Arroyo sa kamot ni Bush kag sa mga kahimbon sini nga uhaw katama sang gera. Ginpamilit niya nga dapat iatras ni Macapagal-Arroyo ang tanan nga tropa sang US sa Mindanao agud indi maliwat sa pungsod ang trahedya pareho sang gera sa Vietnam. Ginbasa man sa rali ang mensahe ni Jaime Cardinal Sin, nga nagpaandam batuk sa "mga kaaway sang kalinungan." Ginpakamalaut man ni Guingona ang nagabaskog nga interbensyon sang US sa pungsod.

Naglunsar man sang nanari-sari nga porma kag pamaagi sang pagprotesta sa nagkalain-lain nga babin sang pungsod. Sa UP Diliman, Quezon City, naghiwat sang Peace Concert. Sadtong Pebrero 27, masobra 500 estudyante ang nagpulaw sa UP Los Banos. Sa Pangil, Laguna, nagsindi sang mga kandila ang pumuluyo. Masunod nga adlaw, sa Crossing, Los Banos, 4,000 myembro sang Justice Not War Coalition-ST ang naghiwat *prayer rally* bag-o dumiretsa sa Maynila. Mga 1,000 katawo halin sa pito ka probinsya sang Central Luzon ang nagrali sa Angeles City sa pagpamuno sang Bayan. Nagsindi sang mga kandila sa Penaranda Park ang mga estudyante kag titser sang walo ka eskwelahan sa Legazpi City, Albay sa pagpamuno sang Promotion of Church People's Response (Bicol). Masobra 1,000 ang nagpangadi sadtong gab-i sang Pebrero 28 sa St. Ferdinand Cathedral, Lucena City. May mga paghulag man sa Baguio City ang Innabuyog-Gabriela. Nagtipon man ang mga nagaprotesta sa Immaculate Conception Cathedral sa Puerto Princesa City, Palawan.

Gindeklarar sang mga organisador sang rali nga masundan pa ini sang madamo pa nga mga porum kag martsa para sa kalinungan sa nagkalain-lain nga babin sang pungsod. **AB**



## Gaway sang US

**Paagi sang AGILE, direkta nga ginapasilabtan sang US ang ekonomya sang Pilipinas**

**B**umukas sining karon lang sa mata sang publiko ang mga konkretong ebidensya sang madalum kag lapnagon nga pagpasilabot sang gubyernong US sa mga pangkulod nga halambalanon pangabuhian sang Pilipinas.

Nabulgar sining Pebrero nga nagamentinar ang US sang mga tinawo kag upisina sa importante nga departamento kag ahensya pang-ekonomya sang gubyerno paagi sang AGILE (o Accelerating Growth, Investment and Liberalization with Equity). Ang AGILE ang nagsiguro para sa US nga maaprubahan tubtub sa pinakapino nga detalye ang mga kinahanglanon nga layi kag programa pang-ekonomya sang Pilipinas santo sa polisiya sang imperialistang "globalisasyon."

Ang AGILE isa ka programa pormal nga ginhimo sadtong 1998 nga may tuyo nga ipatuman ang mga layi kag polisiya nga gina-insister sang US para sa todo-todo nga liberalisasyon sang ekonomya sang Pilipinas. Gintukod ini sang Development Alternatives, Inc. (DAI), isa ka kampanya nga Amerikano nga madugay na may hugot nga angot sa gubyernong US kag espesyalizado sa pagduso sa nagkalain-lain nga pungsod sang mga "reforma panggubyerno" nga pabor sa US. Para ipatuman ang proyektong AGILE sa Pilipinas, nagbaton ang DAI sang \$41.2 milyones halin sa US Agency for International Development. Si US Ambassador Francis Ricciardone ang nagaserbi

lokal nga tagakoordinar sang mga proyekto sang DAI sa Pilipinas. Kahimbon man sang AGILE ang mga ahensya nga pareho gaway sang imberyalismong US, pareho sang Asia Foundation, Center for Research and Communications kag ang Foundation for Economic Freedom. Lunsay man ginapunduhan ang mga ini sang US kag kilala nga mga prente kag pugad sang mga ahente sang US Central Intelligence Agency (CIA) sa Pilipinas.

Ang AGILE may mga upisina sa sulod sang importante nga departamento pang-ehekutibo kag ahensya sang gubyerno, lakip ang Bangko Sentral sang Pilipinas.

Ang 99 sining mga tinawo sa natungdan nga mga upisina nagaserbi nga utok sang mga ginahingyo nga kasuguan, layi kag polisiya nga ginaduso sang mga natungdan nga mga departamento kag ahensya. Ang mga ini may importante nga kabangdanan sa halambalanon sang ekonomiya sang pungsod, labi na kaangut sa liberalisasyon sang baligyaanay kag pagpangcapital. May ara man nga mga tinawo ang AGILE nga nakasentro sa Kongreso kag Senado agud pat-uron nga mapalig-on ang mga ginahingyo nga kasuguan sa Pilipinas nga gusto iduso sang US. Nagahatag kag nagapahapos sang dalagku nga mga "bulig pangpinansya" ang AGILE sa mga programa kag proyekto sang mga

"ginaganyat" sining mga upisyales sang gubyerno.

Sa ubay sang AGILE, nangin layi kag ginpatuman ang pinakamalahalon nga tikang sang reaksyunaryong estado sa nagligad nga duha tubtub tatlo ka tuig. Kalakip diri ang masunod: General Banking Act of 2000, Electric Power Industry Reform Act, Retail Trade Liberalization Act, Securities Regulations Code, Electronic Commerce Law, Customs Valuation Law, Judicial Reform Project, Special Purpose Assets Vehicle, Air Transport Agreement kag iban pa. Ang mga ini lunsay nagaduso sang liberalisasyon sang ekonomya.

Wala untat nga ginaduso sang AGILE ang pribatisasyon sang mga ahensya sang gubyerno. Ini ang sa likod sa pagbungkag sang National Food Authority kag pagkuha sang mga taripa sa mga produktong agrikultural sandig sa mga probisyon sang GATT kag WTO. Ini man ang pangunahon nga promotor sang pagbungkag sang Bureau of Internal Revenue para mabayluhan sang National Authority for Revenue Administration.

Imbolbado man ang AGILE sa pagsulat kag pagduso sa Kongreso sang Anti-Money Laundering Act (AMLA). Ang pagpatuman sang AMLA hugot ginaduso sang US para kuno ipiton ang pondo sang mga "terorista." Gusto sini hatagan sang malapad nga awtoridad ang gubyerno nga usisaon ang ano man

nga *bank account* nga ginabilang sini nga makaduluda. Labag ini sa daan nga nagaluntad na nga polisiya sa pagkapribado sang mga transaksyon sa bangko.

Indi makakilibot ang nabulgar nga idirektang pagpasilabot sang imberyalismong US paagi sa AGILE. Indi man makakilibot nga bulag ini ginadevensahan sang papet nga gubyerno. Agud masalbar ang kaugalingon kag malikawan ang dugang nga pagkangil-ad sang pumuluyo, pilit pagguwaon sang Malakanyang nga nagahatag lamang sang "panugyan" kag pagtuon ang AGILE.

Sa atubang sang pagbuyagyag sang mga direktang dikta kag pagpasilabot sang US sa mga polisiya kag layi sang Pilipinas, ginapamilit sang Malakanyang kag Kongreso nga "indi ang AGILE kundi ang gubyerno lamang" ang nagadesisyon sa paghimo sang mga layi. Bangud sini, labi lamang nagatingkad ang pagkapapel sang reaksyunaryong estado.

Ginakumpirma sang tanan nga ini ang madugay na nga ginahambil sang Partido kag rebolusyonaryong hublag nga lubos na gid ang pagginahum neokolonyal sang US sa Pilipinas kag ang gubyerno sini isa lamang ka papet nga gubyerno nga sa kontrol sang imberyalismong US. Sa atubang sang pagtampok man subong sang pagpasilabot sang US sa mga pangkulon nga halambalanon militar kag pangpolitika sa pungsod, ang santo sa panahon nga pagkabuyagyag sang mga ginahimo sang AGILE nagapakita kon ano kakumprehensibo kag wala patawid ang pagpasilabot sang US sa tanan nga aspeto sang kabuhi-pangkatilingban sa Pilipinas.

Ginapamatud-an sang mga ini ang kahustuhan kag hugot nga kakinahanglanon nga isulong ang rebolusyonaryong paghimakas para makapangin-padlos sa gapos sang imberyalismong US. **AB**

## Pila sa mga ahensya nga ginapadalagan sang AGILE

- \* Bangko Sentral ng Pilipinas
- \* Department of Finance
- \* Department of Budget and Management
- \* Department of Trade and Industry
- \* Securities and Exchange Commission
- \* Bureau of Internal Revenue
- \* Bureau of Customs
- \* Philippine Stock Exchange
- \* National Telecommunications Commission
- \* National Economic Development Authority
- \* Department of Transportation and Communications
- \* Department of Agriculture



## Sunod-sunod nga mga opensiba, ginlunsar subong nga Pebrero

Sunod-sunod nga bunal halin sa Bagong Hukbong Bayan (BHB) ang ginbaton sang mga reaksyunaryo kag papet nga tropa militar sining Pebrero.

### Mga tropa sang Philippine Army, CAFGU gin-ambusan sa Capiz.

Napatay ang anum ka tropa sang Special Operations Team (SOT) sang Task Force Panay kag isa ka elemento sang CAFGU sa isa ka ambus sadtong Pebrero 24 sang mga Pulang hangaway sang Jose Percival Estocada Command-Central Front sa Barangay Daan Sur, Tapaz. Isa pa ka suldado ang napilasan. Nagbulag ang nasambit nga hubon sa 18 katawong platun sang 12<sup>th</sup> IB sang maambusan sila samtang nagatabok sa Sapa sang Sibaguan.

Naubos ang halos tanan nga pwersa kag naagaw ang ila apat ka M16, isa M203, isa M14 kag isa UHF radyo. Sa pihak nga bahin, suno sa Coronacion "Waling-Waling" Chiva Command-Panay, nangin martir sa away nga ini si Ismael "Ka Bob" Geganto, lider sang nag-ambus.

### 10 matag-as kalibreng armas, naagaw sa Agusan del Sur.

Isa ka wala lupok nga reyd ang ginlunsar sa Barangay Zamora, Talacogon. Nakaagaw sila sang pito M14, duha M16, isa Garand, kag nanarisaring kalibre sang bala kag mga unipormeng patig.

### Detatsment sang pulis, ginreyd sa Sorsogon.

Tatto ka pulis ang napatay kag isa M16 ang naagaw sang BHB sa isa ka reyd sa Gubat sadtong gab-i sang Pebrero 14. Nahimo sang BHB ang makahason nga reyd sa Kababayan Police Assistance Center nga 300 metros lamang ang kalayuan sa Gubat Municipal Police Station kag sa hedkwarters sang 508<sup>th</sup> Mobile Police Group kag 21<sup>st</sup> IB. Bag-o ini, dungan nga ginharas sang BHB sadtong gab-I sang Pebrero 13 ang mga detatsment sang PNP sa Barangay Tandaay, Nabua kag Barangay Parubcan, Resentacion, lunsay sa Camarines Sur.

### 10 suldado, patay sa Zambales.

Baliskad sa report sang Northern Luzon Command (Nolcom), omdo duha kundi 10 tropa sang 24<sup>th</sup> IB ang namatay sa engkwentro sa Barangay Cabauatan, Botolan sadtong Pebrero 1 (indi Pebrero 7, pareho sa una nga ginbalita). Madamo man ang napilasan nga pwersa militar, suno sa pagtadlong ni Jose Agtalon, tagapamaba sang Josefino Corpuz Command sang BHB-Gitang Luzon. Ginpangin-wala man niya ang report sang militar nga 18 hangaway sang BHB ang napatay sa inaway. Suno kay Agtalon, isa Pulang hangaway ang nangin martir sa inaway.

Bunga sang ila pagkalutos, binalikan sang mga pasistang militar ang mga ginasuspetsahan nga simpatisador sang rebolusyonaryong hublag. Suno kay Agtalon, ginmasaker sang mga suldado sang 24<sup>th</sup> IB ang isa ka anum-katawong pamilya sang Aeta sa Sityo Palis, Barangay Magisgis, Botolan. Nagsabwag man sila sang kalakasan sa kaiping nga Sityo Nakolkol.

## Masupog nga hepe sang pulis, ginsilutan sa Cavite

Madinalag-on nga ginsilutan sang mga espesyal nga operatiba sang Melito Glor Command (BHB-Timog Katagalugan) sadtong kaagahan sang Pebrero 14 si Sr. Supt. Eriberto Paglinawan, masupog nga hepe sang pulis sa Cabuyao, Laguna. Gintigayon ang pagsilut sa Barangay Umil, Silang, Cavite. Nakuha sang BHB ang iya M14 kag .45 nga pistola.

Suno kay Tirso "Ka Bart" Alcantara, tagapamaba sang Melito Glor Command, ang labing ulihi nga mga kasu ni Paglinawan amo ang duha ka beses ng direktang pagpamuno sa mapintas nga pagbungkag sa mga barikada kag picketlayn sang mga nagawelga nga mamumugon sa Nestle-Philippines sa Sala, Cabuyao, Laguna. Sa isa ka insidente nga

natabo sadtong Hunyo 3, nag-abot sa 17 mamumugon ang napilasan, lakip ang nabalian sang braso, naglitik ang ulo kag nabalian sang abaga. Madamo nga iba pa ang wala kalooy nga gin pangalampusan, ginbakol kag ginbomba sang tubig nga may halo nga kemikal kag gintirgas. Nagahimo man siya sang pagpagsona, pagpamahug kag pagpaniktik sa mga komunidad nga mabaskog nagasuporta sa welga.

Madugay na nga aktibo si Paglinawan sa kampanyang pagpaniktik kag "anti-insurhensya." Bag-o mangin hepe sang Cabuyao sadtong 1988, si Paglinawan nakadestino sa Regional Intelligence and Investigation Division sa Camp Vicente Lim sa Laguna.

## Amerikano nga upisyal, nikit-an sa Bicol

Nikit-an nga nagalibot sa mga sonang gerilya sa Bicol si US Army Maj. Jeffrey D. Antonio. Kabahin ini sang paghanda sa Bicol bilang erya nga pagatilawan sang mga konsepto kag taktika nga kontra-gerilya nga gusto ipattuman sang US sa Pilipinas. Ginpat-ud sang mga pwersa sang 203<sup>rd</sup>, 901<sup>st</sup> kag 902<sup>nd</sup> Brigade ang seguridad ni Maj. Antonio sa paglibot sa mga lugar plano nga pagahiwanan kuno niya sang "US-RP humanitarian assistance" sa rehiyon. Kaangot sini, naglunsar sang malaparan nga *clearing operations* ang mga nasambit nga tropa sang AFP.

Duha ka adlaw pagkatapos ang nasambit nga "pagbisita," ginlunsar ang una nga Regional Area Coordinating Center sang KALAHİ (Kapit Bising Laban sa Kahirapan). Kabaliskaran sa pangalan sini, ang pangunahon nga katuyuan kag kabilugan nga kaundan sini amo ang pagkoordinar kag pagkumbinar sang militar, pulis kag burukratiko nga makinarya amo man ang inisyatiba pangpropaganda kag diplomatiko para sa isa ka kumprehensibo nga programa sa "kontra-insurhensya." Kabahin ini sang National Internal Security Plan nga ginorma sang Cabinet Oversight Committee on Internal Security sang Malakanyang. Kalakip sa "diplomatiko" nga inisuyatiba ang ginatukod sa Bicol nga "US-RP humanitarian assistance."

## Welga sa Central Azucarera de Tarlac, madinalag-on

Napadaog sang 661 welgista sadtong Pebrero 27 ang halos tanan sang ila ginademand sa tag-iya sang Hacienda Luisita kag Central Azucarera de Tarlac (CAT) pagkatapos sang anum ka adlaw nga welga.

Pangunahon sa mga naangkon sang mga mamumugon ang pagpabalik sang mga benepisyo medikal para sa mga katapu sang Central Azucarera de Tarlac Labor Union (CATLU); gilayon nga pagtalana sang mga regular nga empleyado sa mga nabakanteng pusyon; kag pagpaparegular sa mga *seasonal* nga mamumugon nga nakatrabajo na sang anum ka bulan.

Ginsuportahan ang CATLU sang mga katapu sang Kilusang Mayo Uno-Nagkakaisang Manggagawa ng Tarlac (KMU-NMT).

Ang Hacienda Luisita kag CAT ginapanag-iyahan sang mag-utod nga Cojuangco, kalakip si anay Presidente Corazon Aquino kag anay Cong. Jose Cojuangco, Jr., nga subong isa sa mga adbayer ni Macapagal-Arroyo.



## Paghimakas sa Lepanto Mines, madinalag-on


Nagmadinalag-on ang welga sang mga mamumugon sa Lepanto Consolidated Mining Company (LCMC) sining Marso 2 sang magpasugot ang maneydsment nga pabalikon sa trabaho ang 24 sa 42 lider sang unyon nga ginsipa sang LCMC (ang nabilin nga 18 boluntaryo naghalin sa LCMC pagkatapos makabaton sang *separation pay* kag iban pa nga benepisyo).

Antes sini, pila ka beses nga gin-atake sang mga pulis ang piketlayn sa tuyos nga bungkagon ang welga. Duha ka pulo'g anum ka welgista ang gin-aresto, isa ang gin-atake sa tagipusuon kag namatay bangud sa gitgitan sa piketlayn kag madamo ang ginpangbalbal sang salakayon sang mga pulis ang kubay sang mga welgista sadtong Pebrero 8, 18 kag 19.

Ginlunsar sang mga mamumugon ang welga sadtong Pebrero 1 agud pamatukan ang pilit nga pagtrabaho bisan Paskua, ang mas mahaba nga adlaw sang pagtrabaho kag pagdugang sang mga mamumugon nga kontraktwal. Ang welga ginsuportahan sang Cordillera Peoples Alliance, Kilusang Mayo Uno kag Dinteg-Cordillera Human Rights Organization.

Ang LCMC ang isa sa pinakadaku nga prodyuser sang bulawan kag saway sa pungsod kag may 2,586 nga pwersa sa pagtrabaho. Nagakita ini sang \$47 milyones (masobra P2.54 bilyones) kada tuig sa pag-eksport sang mga mineral.

## Transportasyon sa Pampanga, Bulacan kag Negros, paralisado sa mga welga



Paralisado ang pangpubliko nga transportasyon sa Pampanga sining Marso 4 kag sa Bulacan sadtong Pebrero 24 bangud sa malaparan nga welga sang pila ka libo nga drayber sang dyip kag traysikel agud pamatukan ang sobra kataas nga sukot para sa pagpatesting sang ila mga salakyan sa idalum sang Clean Air Act. Ginapamatukan man nila ang padayon nga pagtaas sa presyo sang langis.

Sa Pampanga, paralisado ang 90% sang transportasyon sa bug-os nga Angeles City kag halin sa syudad padulong Mabalacat kag Tarlac. Paralisado man ang 70% sang transportasyon sa San Fernando.

Sa Bulacan, nagbarikada ang mga drayber sa Malolos City, Mecaúyan, Baliuag, Plaridel, Pulilan kag Sta. Maria.

Nauntat man ang halos 95% sang transportasyon sa Negros Occidental kag pila ka bahin sang Negros Oriental sadtong Pebrero 20-21 sang magwelga ang mga katapu sang United Drivers-Operators Center (UNDOC) Bacolod City agud pamatukan ang Clean Air Act.